

畿輔通志卷二百五

列傳十三 宋一

宋

順天府

田重進

劉審瓊

李懷忠

張鑑

馬知節

許驥

許袞

楊崇勳

劉紹榮

趙振

子珣 璞

張玉

田偉

馬湘

李涪頤

張世傑

保定府

劉文質

父審琦 子渙 滬

楊文詡

盧之翰

程元白

從祖羽

叔父象

子琳

孫全照

齊恢

董元亨

張述

許介

永平府

陳若拙

河間府

李璘

楊信

弟嗣

李罕澄

皇甫繼明

王繼升

子昭遠

周瑩

高珪

劉摯

子歧

張慤

權邦彥

龔夬

弟大壯

牟大壯

聶湖

天津府

賈黃中

父玘

索湘

張疑

子昭遠

胡元興

張知白

崔諒

吳及

李之純 弟之儀

邢希載

正定府

李至

王化基 子舉正 舉元 孫詔

牛思進

曹璨 弟瑋 葛懷敏 父霸

賈昌朝

弟昌衡 從子炎

高化

賈逵

劉昌祚

父賀

曹佾

子評 誘 從弟偕

劉絢

楊粹中

智浹

韓元龍

王興

順德府

劉知信

子承宗

陳薦

成閔

范炎

宋

順天府

田重進幽州人周顯德中應募爲卒隸太祖麾下從征契丹至陳橋還遷御馬軍使積功至瀋州刺史太平興國四年從征太原擢天德軍節度改領靖難軍節度雍熙中出師北征重進伏兵飛狐南口擒契丹驍將大鵬翼監軍馬贊副將何萬通等連下飛狐靈州等城進攻蔚州其牙校李存璋等殺酋帥來降會曹彬師不利乃命重進董師駐定州遷定州駐泊兵馬都部署三年率師克遼祁溝關歷彰信軍節度正定尹成德軍節度移京兆尹永興軍節度改知延州復還鎮至道三年卒年六十九贈侍中太宗居藩邸時嘗遣以酒炙不受使者曰此晉王賜也何爲不受重進曰爲我謝晉王我知有天子耳太宗嘉其樸忠終始委遇焉子守信六宅使守吉



閩門祇候

宋史

劉審瓊涿州人漢湘陰公鎮彭門審瓊隸帳下周祖受命遁去依永興軍節度劉訥頗委任之訥卒屬太祖節鎮給事左右及受禪補殿直從平澤潞改供奉官累遷至軍器庫使出知鎮州太宗征河東駐蹕月餘儲侍無闕遷檀州刺史知潭州州素多火日調民積水爲防民甚勞之審瓊至悉罷之以爲民便徙知河陽以衰老改坊州刺史至道三年卒官孫爽進士及第後爲祠部員外郎祕閣校理

宋史

李懷忠涿州人初名懷義太祖掌禁兵時隸帳下累遷殿前都指揮使都虞候領開州刺史乾德中授東西班都指揮使改領富州從征晉陽身先士卒搏戰中流矢戰益力還授散指揮使尋遷富州團練使改日騎左右廂都指揮使上幸西

京欲留都之懷忠曰東京有汴渠之漕歲致江淮米數百萬斛禁衛數十萬人仰給於此帑藏重兵皆在焉臣實未見遷徙之利上嘉納之太宗卽位改領本州防禦使稍遷侍衛步軍都虞候領大同軍節度改步軍都指揮使卒贈侍中

宋史

張鑑字德明涿州人瀛州團練使藏英之孫太平興國三年進士除大理評事累官監察御史奉詔決獄江左頗雪冤滯累遷左諫議大夫戶部使咸平初以工部侍郎出知廣州居二年民條其政績上請刻石三年移知郎州溪洞羣蠻皆俯伏聽命徙知相州卒子廉爲殿中丞士宗太子洗馬士程屯

田員外郎

涿州志

馬知節字子元薊州人贈檢校太保大同軍節度使全義子

宋史七歲而孤太祖哀之召見命送國子學

玉壺情話

太宗時以廢

補官年十八監彭州兵衆憚之如老將改潭州慕州守何承  
矩儒雅折節讀書雍熙間護兵博州契丹入邊以有備引去  
徙知定遠軍倡議餼粟之紅腐者獲五十萬斛分給諸屯遂  
省河南輸餉之役厯知深州慶州遷西京作坊使改知梓州  
詔與劉繼恩同討賊繼恩惡知節不附已付羸兵三百遣守  
彭州至彭賊十萬來攻知節力戰竟日橫槊潰圍出遲明援  
兵至復鼓噪入賊遂潰去授益州鈐轄加益漢九州都巡檢  
使遷內圍使率兵三百討平劉盱之亂咸平初領登州刺史  
知秦州州所質羌酋支屬悉縱還之羌人悅服有銀鑛久竭  
而課額弗除知節三上疏請蠲之遷西上閣門使知益州兼  
本路轉運使蜀物之輸也以部舟載而籍富民以挽舟民病  
之知節請以省校代而區其程途蜀困稍紓厯知延鎮定州

累遷宣徽北院使兼樞密副使時王欽若爲樞密使知節薄  
其爲人每面詆之出爲潁州防禦使知潞州移知天雄軍召  
拜宣徽南院使知樞密院事以疾乞歸卒贈侍中諡正惠宋史  
許驥字克升薊州人祖信父唐世以財雄邊郡後唐之季唐  
知契丹將擾邊潛齎百金而南居睢陽娶李氏女生驥風骨  
秀異十三能屬文太平興國初廷試擢甲科通判益州雍熙  
二年官江南轉運副使洪吉供運船因水毀物主吏懼罪故  
覆舟鞠獄者按以欺盜當流死者數百人驥往訊得情獲寬  
減端拱初以兵部郎中領西川轉運使擢右諫議大夫知益  
州召歸上言蜀民浮窳易搖宜擇忠厚者撫之爲預備旣而  
李順叛衆服其先見命知審官院遷御史中丞真宗卽位改  
兵部侍郎出知單州卒年五十七贈工部尙書子宗壽後爲

殿中丞

宋史

許袞字公儀燕人雍熙中爲均州防禦判官以能擢右贊善大夫判薊州時江南始歸朝廷宿政夢如袞善理之就進殿

中丞

雍正志

楊崇勳字寶臣薊州人祖守斌父全美皆爲指揮使崇勳以父任爲東西班承旨事真宗於東宮真宗聞其嗜學授以書遂稍通兵法及前代興廢事累遷英州防禦使兼馬軍都虞候并代州馬步軍副都總管留爲客省使領羣牧使發周懷政傳位太子謀逆授桂州觀察使仁宗卽位以彰德節度觀察留後知陳州累遷宣徽南院使進樞密使因上章懿册不至被劾以同平章事河陽三城節度使判許州翌日改陳州景祐初懷政家人訟冤罷同平章事歷知壽亳陳三州以邊

警復拜同平章事判定州以老徙成德軍又徙鄭州坐子宗誨納賕枉法以左衛上將軍致仕改太子太保卒贈太尉諡

恭毅

宋史

劉紹榮燕人官成都都巡檢使

宋史雷德驥傳

咸平三年益州軍變

宋史真宗本紀

成都官吏聞變皆奔竄紹榮獨持刃格鬪力屈被執

欲奉爲帥紹榮罵曰我豈能與汝同逆汝亟殺我我豈肯負

朝廷哉賊乃奉都虞候王均爲王紹榮自經死

宋史雷德驥傳

趙振字仲威雄州歸信人景德中從石普於順安軍獲契丹

陣圖授三班借職遷隰州兵馬監押捕盜青灰山殺獲甚衆

高平蠻叛徙湖北都巡檢使兼制置南路以南方暑溼弓弩

不利別創小矢能及三百步中輒洞穿蠻遂駭散遷慶州沿

邊都巡檢使時金湯李欽白豹神木馬兒高羅跋臧三族尤

悍振募降羌昭以利令相攻破十餘堡

宋欽等遂來歸振爲

置酒取細仗分置百步外共射振十矢皆貫欽等驚誓不復

犯

宏簡錄

明年涇原屬羌胡薩逋歌等叛鈴轄王懷信以兵數

千屬振游奕屢捷嘗從數十騎詣懷信遇賊十倍射殪數十

遂卽潰散未幾賊數萬圍平遠砦都監趙上龍戰沒振出別

道力戰抵砦奪取水泉遂解圍復追斬數千級徙涇原都監

數遷至京東都大提舉捉賊明年知環州

宋史

加領象州防禦

使

宏簡錄

元昊將反爲金銀冠佩飾甲騎遺屬羌振潛以金帛

誘取之得冠佩銀鞍三千甲騎數百告鄰部早爲備不聽於

是東菱金明萬劉諸族兵數萬悉爲賊有劉平等亦皆敗惟

環慶無患擢龍神衛四廂都指揮使鄜延路副都總管知延

州尋改捧日天武四廂都指揮使賊寇塞門砦振擁兵幾入

干不往救砮被圍五月乃陷砮主高延德監押王繼元皆沒  
於賊貶白州團練使知絳州未行延德繼元家復訴於朝敕  
御史方偕就核再貶太子左清道率府潭州安置踰年復右  
武衛將軍惠州團練使并代路兵馬鈐轄就遷副總管邠州  
圍練使元昊破豐州謀襲近砮振率鈐轄張亢麥允言出麟  
州深柏堰擊敗之兼領嵐憲六州軍事河外饑振設法通商  
得米數十萬斛進博州防禦使改解州致仕復起爲左神武  
軍大將軍卒振有武力善騎射尙氣而輕財衆樂爲用子珣  
瑜珣年十六仁宗召試便殿授三班借職景祐中復召見閱  
武伎又試策畧於中書條對數千言進閣門祇候未幾除濠  
州兵馬都監宋史隨父西邊訪得五路徼外形勝利害作聚米  
圖經五卷宏簡錄康定二年書成經畧韓琦以聞詔取書召見



執政呂夷簡宋庠言用兵以來策士之言以千數無如珣者

文獻通考珣又上五陣圖兵事十餘篇帝給步騎使列陣旣成臨

觀之擢通事舍人招討都監珣自以年少新進辭都監授兵

萬人賜鎧仗令自擇偏裨參佐居涇原兼治籠竿城麻種党

留百餘帳擾邊珣引兵二萬自靜邊歷揆吳抵水甯襲賊俘

獲數千計靜邊將劉滬後爲賊所掩珣從騎數百拔出之瞎

種居龕谷無所屬珣與書招之遣以緜縣遂聽命改本路都

監詔追入朝將行適元昊大入府檄留珣會葛懷敏於瓦亭

時懷敏屯五谷口聞夏人徙軍新濠外議欲質明掩襲珣謂

懷敏曰敵遠來其鋒甚銳莫若依馬欄城布柵以扼其路守

鎮戎城以便餉道俟其衰擊之可獲勝不然必敗懷敏不聽

率兵抵定川未及陣夏人引鐵騎來犯東壁兵卒潰中軍大

擾珣率死士力戰夏衆稍卻懷敏走鎮戎夏騎復四合珣被擒瑜以身免珣美風儀性剛勁好學而恂恂類儒者既没人

多惜之贈莫州刺史瑜弟璞亦知名

宋史案歸信今保定縣雍正志趙振編保定府

誤今據乾隆府廳州縣志改編順天

張玉字寶臣保定人以六班散直隸狄青麾下築青澗招安若遇夏兵三萬玉單騎持鐵簡出關取挑戰者之首及其馬而還軍中因號曰張鐵簡仁宗聞曰真勇將也以爲本路同巡檢從征儂智高抵歸仁驛遇賊率右廂突騎橫貫賊壘賊大潰帝召見使作銳陣於殿庭觀破賊之勢擢廣西鈐轄徙大名進龍神四廂都指揮使爲副都總管諒祚攻大順城玉以兵三千夜擊卻之累遷昭州防禦使徙涇原熙甯中慶州卒叛玉追襲於石門卒遂降玉殺其降者二百人坐奪職改

陵州團練使尋復職王韶開熙河玉以宣州觀察使爲副都  
總管入爲馬步軍都虞侯卒贈建雄留後宋史

田偉燕人爲江陵尉因家焉作傳古堂藏書五萬七千卷無

重複者黃魯直曰吾校中秘書及徧遊江南文士圖書之富

未有過田氏者雍正志

馬湘順州人鄉進士種學績文有聲當世雍正志案本傳不詳年代姑從雍

正志次田偉後

李淳頤字子陰香河人知祥符縣熙甯中青苗法行計息不

及則黜降諸邑爭以多爲貴祥符獨貸三之一安石怒謫廣

信通判後官至刺史雍正志

張世傑范陽人少從張柔成杞有罪遂奔宋隸淮兵中阮思

聰見而奇之言之呂文德召爲小校累功至黃州武定諸軍

郡統制呂文煥之以襄陽降元也世傑將五千人守鄂州以鐵絙鎖兩城夾以礮弩元軍破新城長驅而前遣人招世傑世傑不納力戰元師不得前元丞相伯顏乃潛舟自唐港入漢東攻鄂鄂降世傑遂提兵入衛道復饒州乃入朝時方徵諸將勤王多不至獨世傑來上下歎異不數月累加至保康軍承宣使總都督府兵遣將取浙西諸郡復平江安吉廣德溧陽諸城遂大出師焦山令以十舟爲方碇江中非有號令毋發碇示以必死元帥阿朮以火箭攻之世傑兵大敗奔圖山疏請濟師不報累遷保康軍節度使召入衛加檢校少保德祐二年元軍迫臨安世傑請移三宮入海而背城一戰不從世傑乃提兵入定海石國英遣郡統下彪來說降世傑以爲彪來從己也椎牛享之酒半彪從容爲言世傑大怒斷其

舌磔之

宋史

益王昞自温州召世傑世傑遂率兵之温奉是爲

天下兵馬都元帥廣王昺副之遂入閩與陳宜中等立昞於

福州改元景炎宜中爲左丞相世傑爲樞密副使

宋史二  
王本紀復

潮州及邵武軍奉帝居潮州之淺灣元復陷邵武入福州帝

奔井澳遂崩世傑奉昞爲帝改元祥興徙居碙州復徙居厓

山厓山在新會縣南八十里巨海中與奇石山相對立如兩

扉世傑以爲天險可阨以自固故奉帝駐之加越國公二年

正月張洪範襲厓山世傑下令焚行朝草市結大舶于餘碇

海中四周起樓棚如城堞奉帝居其間爲死守計人皆危之

厓山北淺舟不可進洪範由東轉而南入大洋與世傑師相

遇薄之世傑舟堅不能動洪範乘風縱火焚之世傑戰艦皆

塗泥傅長木以拒火火無如之何洪範乃使世傑甥韓某招

之三往不從乃以舟師據海口斷汲路世傑兵士茹乾糧十餘日下掬海水飲之皆嘔泄兵大潰帝崩於海世傑乃以十六舟斷維奪港而去欲奉楊太妃復求趙氏後立之而太妃亦赴海死世傑艤舟南恩之海陵山散潰稍集謀入廣颶風大作衆勸登岸世傑登舵樓焚香祝曰我爲趙氏亦已至矣一君亡復立一君今又亡我未死者欲更立趙氏耳今若此豈天意邪風濤愈甚遂墜水溺死諸將函其首葬潮居里

宋名

臣言  
行錄

保定府

劉文質字士彬保州保塞人簡穆皇后從孫也父審琦虎牢關使從討李重進戰死文質幼從母入禁中太宗授以左班殿直遷西頭供奉官寄班祇候帝數訪以外事嘉其忠謹賜

白金百斤出爲兩浙走馬承受公事攝西京左藏庫副使尙  
嵐軍使賜金帶名馬徙知麟州改麟府濁輪砦兵馬鈐轄擊  
蕃酋萬保移走之越河破契丹拔黃太尉砦殺獲萬計賜錦  
袍金帶徙知慶州李繼遷入寇文質將出兵而官吏不敢發  
庫錢乃以私錢二百萬給軍士皆感奮遂大破賊徙涇州充  
麟州清遠軍都監又破敵於枝子平咸平中清遠軍陷坐逗  
撓奪官雷州安置久之起爲太子率府杭州駐泊都監數遷  
至秦州鈐轄建小落門砦親率士版築賜白金五百兩天禧  
中知代州再遷內園使知邠州數從曹瑋出戰復徙秦州鈐  
轄領連州刺史再知代州卒後賻其家官子三人文質以簡  
穆親又父死事故前後賜予異諸將眞宗嘗問保塞之舊文  
質上宣祖太祖賜書五函仁宗亦以書賜之然性剛喜評刺

短長雖貴近無所避故不大顯子十六人渙漚皆知名宋史渙

字仲章廕將作監主簿監并州倉天聖中上書請太后還政

后震怒將黜隸遠州呂夷簡薛金救免仁宗親政擢右正言

與孔道輔等伏闕爭廢后罰金宏簡錄坐前官并州與營妓遊

黜磁州通判尋知遼州宋史擢屯田員外郎宏簡錄知晉州康定

二年議遣使通河西唘氏渙請行文獻通考間道走青唐諭以恩

信得其誓書與并州地圖以獻宋史唘氏自此與中國通而元

昊始病於牽制矣作西行錄一卷文獻通考加真昭文館數遷至

吉州刺史轉保州虎翼軍謀叛渙單騎往諭縛其渠誅之徙

登州大治戰艦海寇皆斂戢詔嘉獎之厯知邢恩冀涇澶五

州其在澶時民以地震乏粟爭賣牛以自給價甚淺渙盡出

公帑買之明年民無牛耕田價踊貴乃復以牛賣與民皆如



舊直民賴以不失業累遷至鎮甯軍節度觀察留後入爲工

部尙書致仕渙有才氣喜進取朝廷之拓洮岷討安南也渙

既老矣猶露章請自效不報卒年八十一宋史滬字子濬頗知

書深沈寡言以廕補三班奉職數遷至右侍禁康定中爲渭

州瓦亭砦監押權靜邊砦擊敗黨留等族遷左侍禁以韓琦

范仲淹薦授閣門祗候復破穆甯生氏宏簡錄氏西南有城曰

洛川去畧陽二百里地平土沃有水銀洞之利漢民之逋逃

者聚焉曹瑋在秦州時欲得之未獲東都事畧進城章川益屯兵

使人說其城主鐸廝那內附宋史會招討使鄭戢行邊滬復遣

人召鐸廝那遂偕其屬酋來獻結公水洛路羅甘地請爲屬

戶散令滬率兵受地滬既往氏中變滬以兵千人與氏數萬

戰敗之遂盡服秦渭路乃通遷內殿崇班東都事畧戢遣董士廉

助築城功未半戢罷招討涇原帥尹洙以爲不便令罷築滬

不聽

宋史

令張忠往代又不受洙怒使狄青械滬及士廉下獄

氏大驚殺吏民叛上遣使往視氏衆言願以牛羊及丁壯助

工

宏簡錄

乃復以滬權水洛城砦主城成終以違安撫使節制

降鎮戎軍西路都巡檢尋復內殿崇班卒弟淵將以樞東歸

衆遮道號泣請留乃葬水洛立祠祀之蕃官牛裝等請滬之

子弟主其城經畧司以聞乃命其弟滔爲水洛城兵馬監押

城中有碑記滬事

宋史

楊文詡字巨卿東鹿人少孤鞠於世父性敏慧強記通刑名

書數有武力善射年十七從其世父戰契丹於常山能以兵

入得其甲馬及其世父爲峽州麻谿寨主合州兵討叛蠻文

詡以二十五卒前驅與蠻三千遇蠻畏其勇悉還走險蠻酋

據險下射幾盡殺所部文詡乃以兩矢自下顛其酋而後世  
父軍亦至遂戮其衆以歸天子賞其世父一官而以文詡屬  
三班爲殿侍數遷至邵州武岡寨兵馬鈐押歸京師慶厯七  
年卒年七十三葬陳州宛邱縣生三男長早卒次闢爲大理

寺丞次闢

臨川集

盧之翰字維周祁州人太平興國四年舉進士不得解諸登  
聞自陳詔附京兆解試明年登第除大理評事知臨安縣三  
遷殿中丞通判洛州契丹入寇之翰募丁壯決漳御河以固  
城壁秩滿召還遷太常博士厯河東京西轉運副使改工部  
員外郎建議導渙河合淮達許以便漕運加戶部員外郎改  
陝西轉運使遷吏部員外郎至道初李順亂蜀命兼西川安  
撫轉運使賊平還任以薦李憲爲大理丞及阿副使鄭文寶

議城清遠軍又禁蕃商貨鹽事左授國子博士領使如故尋復舊職會調發芻糧輸靈州詔分三道護送之翰違旨擅併爲一敗績於李繼遷大失輜重詔逮問除名貶許州司馬徵授工部員外郎同勾當陝西轉運使真宗卽位復吏部員外郎充轉運使遷禮部郎中咸平元年以疾召還出爲京西轉運使先是廷議城固原州因之翰論罷其後卒修葺爲鎮戎軍之翰坐前議黜知歸州三年授廣南西路轉運使尋改太常少卿知州事五年從知永州未行卒年五十七

宋史

程元白博野人事母至孝與兄弟怡怡爲鄉里所稱從祖羽佐太宗自晉王卽皇帝位爲文明殿學士官至兵部侍郎叔父象與元白同舉春秋皆中第是時羽以給事中知開封府召象及元白謂曰吾新被寵天子待罪於此不欲汝等竝登

科汝等其自擇去就元白遂讓其叔父自引去羽賢之其後  
累舉不中無悔色羽由是大嗟異之以爲不可及太平興國  
五年以明經中第爲虔州贛縣尉蔡州上蔡主簿袁州宜春  
令所至皆有惠愛罷歸退居於蔡州涇化三年卒年四十九  
天聖十一年葬鄭州管城縣馬亭鄉之北田村以子琳貴贈  
太師中書令兼尙書令冀國公子五人瓘瑗琬琳玟瓘官至  
太常博士瑗琬皆早卒玟國子博士琳字天球大中祥符四  
年舉服勤詞學高第試祕書省校書郎改著作佐郎知并州  
壽陽縣遷祕書丞監左藏庫天禧中詔選文學履行召試直  
集賢院仁宗卽位遷太常博士三司戶部判官召修真宗實  
錄書成遂修起居注遷祠部員外郎提舉諸司庫務以本官  
知制誥同判吏部流內銓天聖五年契丹使來賀乾元節命

琳爲館伴使以前廷賀上之卽位使能以理折其妄語也使  
者果復言位次下當遷議者以爲小故可許琳言契丹所以  
與中國好者守先帝約也若許其小將啟其大乃止歲中遷  
右諫議大夫權御史中丞宰相張知白當草制喜曰不辱吾  
筆明年拜樞密學士知益州琳性方重寡言笑凡所處畫常  
先慮謹備其條目甚悉至臨事簡嚴僚吏莫能窺其際嘗夜  
張燈會五門大集州民而城中火起吏如琳教不以白而墮  
卽救止終晏民去始稍知火監軍得告者言軍謀變懼而入  
白琳笑曰豈有是哉監軍惶惑不敢去琳曰軍中動靜吾自  
知之苟有謀者不能隱也已而卒無事蜀妖人自稱李冰神  
子署官屬吏卒以恐蜀人琳捕斬之或言其妄殺人蜀且亂  
上遣使馳視還言誅妖人所以止亂蜀人甚安樂上益賢之

召爲給事中知開封府

歐陽文忠公集

開封人王蒙正者聯姻章獻

太后家其子齊雄毆斃老卒貨其家稱病死琳令有司驗得死狀太后謂琳曰齊雄非殺人者乃其奴嘗毆之耳琳曰使令與已犯同太后默然遂論如法外戚吳氏離其夫而挈其女歸夫訴於琳琳命還女吳氏曰已納宮中矣琳請於帝出之笞而歸其妻厯工部侍郎龍圖學士翰林侍讀學士再知開封府改三司使禁中有所取輒奏罷之進吏部侍郎參知政事遷尙書左丞以市故樞密副使張遜第降光祿卿知潁州累遷工部尙書加大學士河北安撫使改武昌節度使遷知永興軍陝西安撫使夏人以五百戶驅牛羊叩邊言契丹兵至衙頭矣國中亂願自歸琳曰彼詐也聞夏人方捕叛者此其是邪不然誘我也拒不受已而夏果以三萬騎臨境上

以捕降者為詞琳令閉壁偃旗毋妄動賊疑有備遂引去拜

同中書門下平章事判大名府大名人愛之為立生祠改武

勝軍尋移鎮安軍節度使卒贈中書令諡文簡宋明年祿享

太廟加贈太師尚書令累階至開府儀同三司勳上柱國廣

平郡爵公封戶七千四百而實封二千一百賜號推誠保德

守正頌戴功臣妻陳氏封衛一作陳國夫人子四人嗣隆太常

博士嗣弼殿中丞嗣恭太常博士嗣先大理寺丞殿陽文忠公集

孫全照清苑人贈左衛上將軍行友子以蔭補殿直雍熙中

受京南巡檢隸曹彬麾下遷供奉官閣門祇候從田重進擊

賊有功宏簡錄就加西京作坊使兼知威虜軍歷任廣鄆鄜延

路都巡檢使淳化五年率兵從李繼隆克綏州遂借張崇貴

等駐守尋往夏州護屯兵兼知州事數遷至環慶路鈐轄與



李繼和規度靈州咸平五年議城綏州命爲州鈐轄或言其性剛恐僨事乃以曹璨代之既調兵夫二萬餘全照言非傳乃罷移知天雄軍上防秋禦戎策擢平邊軍部署景德元年上幸瀘淵命爲駕前西面邢洛路馬步軍鈐轄兼天雄軍駐泊管句東南貝冀等州鈐轄言敵騎若南逼魏城可設奇取勝上壯之詔都部署周瑩如所請分兵

宋史

果卻敵於魏城加

檢校工部尚書食邑三百戶徙鎮州召還改東上閣門使

宏簡

錄 擬領嚴州刺史上曰全照常慮人疑其嚴刻今領此州似

涉譏諄乃改英州三年遷邠甯環慶都部署趙德明納款朝

議減戍兵全照言邊防未可遽弛忤上意徙知永興軍兼四

方館使西師移屯者至府命兼駐泊鈐轄全照言許州有別

墅乞典是州從之大中祥符中遷引進使踰歲表求歸朝命

掌閣門客省四方館使四年上西幸留為新城都巡檢未幾

卒年六十

宋史

齊恢字熙業蒲陰人唐宰相映之裔也第進士通判陳州提

點成都府路刑獄三年徙河東不通饋遣入為戶部判官神

宗出閣精簡宮僚韓琦薦其賢以直昭文館為穎王府翊善

進太子左論德帝即位拜天章閣待制知通進銀臺司出知

相州召知審官西院糾察在京刑獄卒年六十六恢居鄉里

恂恂有君子稱臨政明白簡約所至人愛之以舊僚故特贈

工部侍郎

宋史

董元亨東鹿人累官至國子博士通判貝州

宋史

慶歷七年冬

至日王則據貝州反

宋史仁宗本紀

元亨方與州將朝賀天慶觀聞

變促馬馳還坐廳事賊黨十餘人擐甲露刃排闥入左右皆

奔潰賊以刃脅元亨索軍資庫鑰元亨據案叱之曰我有死耳鑰不可得也賊將郝用復來索元亨厲聲張目罵賊用遂殺之賊爭入攜鑰而去贈太常少卿錄其子孫三人賊平獲郝用斬以祭之

宋史

張述字紹明遂州人舉進士調咸陽縣主簿改大理寺丞遷太常博士皇祐中上疏請建儲日生民之命繫於宗廟社稷而繼嗣爲之本陛下承三聖之業當傳之千萬年而宗廟社稷未有託焉此臣所以夙夜徬徨而爲陛下憂也謂宜慎擇宗親才而賢者異其禮秩試以職事俾內外知聖心有屬則天下大幸至和元年復上疏曰臣聞明兩作離大人以繼明照四方陛下御天下且三紀矣是日之正中也而未聞以繼照爲慮臣竊疑之歷觀前世或令出宮闈或謀起閹寺或奸

臣首議利幼主以專政假後宮以盜權安危之機發於頃刻豈可恬然而不早爲之計哉述前後七上疏最後語尤激仁

宗終不以爲罪歷通判延州知泗州皆有善政後以職方員

外郎爲江浙諸路提點坑冶鐵錢使道病卒

宋史

許介高陽人淳熙十一年知青陽縣有惠政及去民思之請

於朝祀於所建之九華祠

江南通志

永平府

陳若拙字敏之盧龍人祖思讓官終檢校太傅護國軍節度

父欽祚累遷香藥庫使長州刺史若拙幼嗜學思讓嘗令持

書詣晉邸太宗嘉其應對詳雅欲官之若拙懇辭登太平興

國五年進士甲科授將作監丞通判鄂州改太子右贊善大

夫知單州以能聞改太常丞遷監察御史充鹽鐵判官太宗

以益州繫囚甚衆召若拙往辨釋遷殿中侍御史通判益州  
涪化三年命爲西川轉運副使進正使召歸洛都守李至表  
請若拙佐治改度支員外郎通判西京留司久之柴禹錫鎮  
涇州復奏爲通判遷司封員外郎部送芻糧至塞外優詔獎  
之入爲鹽鐵判官轉工部郎中與三司使陳恕不協求徙他  
局改主判開折司車駕北巡命李沆留守東京以若拙爲判  
官河決鄆州朝議徙城以避水患命若拙與閻承翰往規度  
尋權京東轉運使因發卒塞王陵口又於齊州浚導水勢設  
巨隄於采金山奏免六州所科梢木五百萬民甚便之河平  
真授轉運使召還拜刑部郎中知潭州時三司使缺若拙自  
謂得之及是大失望因請對言父母年老不願遠適求納制  
命上怒追所授告敕黜知處州徙温州代還復授刑部郎中

再爲鹽鐵判官改兵部郎中河東轉運使賜金紫會親祀汾  
陰若拙以所部緡帛芻粟十萬輸河中以助費擢右諫議大  
夫徙知永興軍府時鄰郡歲饑前守下令遏糴若拙爲除其  
令民德之移知鳳翔府入爲給事中知澶州勤於政治任滿  
郡民列狀乞留天禧二年卒年六十四錄其子映爲奉禮郎

宋史

### 河間府

李璘河間人晉開運末契丹犯邊有陳友者乘亂殺璘父及  
家屬三人乾德初璘隸殿前散祇候友爲軍小校相遇於京  
師寶積坊北璘拔刀殺友而慷慨自言爲父復仇案鞫得實  
太祖壯而釋之

宋史

楊信瀛州人初名義顯德中隸太祖麾下爲裨校宋初權內

外馬步軍副都頭累遷殿前都虞候領漢州防禦使改靜江  
軍節度開寶二年散指揮都知杜廷進等謀叛上聞夜啟元  
武門召信逮捕遲明十九人皆獲上親訊而誅之六年遷殿  
前都指揮使改領建武軍節度太祖御龍舟習水戰於後池  
信居元武門外聞鼓噪聲遽入服阜綈袍以見上曰吾教水  
戰耳信乃出上目送之謂左右曰真忠臣也九年授義成軍  
節度太平興國二年改鎮甯軍竝領殿前都指揮使三年春  
卒宋史年八十一河間府志贈侍中弟嗣贊建隆初嗣以信薦爲殿  
直咸平初領獎州刺史三年與敵人戰於廉良斬首二千級  
獲戰馬輜重甚衆拜保州刺史尋召還授本州團練使時楊  
延昭方爲刺史嗣言嘗與延昭同官驟居其上不可願守舊  
官上嘉其讓乃遷延昭官嗣與延昭久居北邊俱以善戰聞

時謂之二楊嗣以武人治郡不屑細務又兼領巡徼在郡日

少城堞多圯壞者詔改深州團練都巡檢使兼保州鈐轄累

遷天雄軍副都部署加龍武大將軍致仕大中祥符六年卒

年八十一錄其子承憲爲侍禁贊稍知書無異能以兄故得

掌禁旅累資至牧守焉

宋史

李罕澄阜城人七世同居漢乾祐三年詔改鄉里名旌其門

閻太平興國六年復旌之

宋史

皇甫繼明冀州蓆人父濟汾川令繼明身長七尺善騎射以

膂力聞郡中刺史張廷翰薦於太祖補殿前指揮使歷左右

番押班都知太宗卽位累遷至捧日軍都指揮使領檀州刺

史太平興國七年坐秦王廷美事出爲汝州馬步軍都指揮

使雍熙三年召入爲馬步軍副都軍頭四年復爲捧日右廂



第三軍都指揮使領澶州刺史田重進北征繼明爲前鋒以  
功加馬步軍都軍頭端拱二年轉龍神衛四廂都指揮使領  
羅州防禦使卽日命副高瓊爲并代部署淳化二年又副范  
廷召爲平虜橋砦兵馬都部署改高陽關部署至道元年改  
領洋州觀察使充環慶路馬步軍都部署繼明謹愿御下嚴  
肅士卒頗畏憚之二年受詔護送輜重赴靈州約靈州部署  
田紹斌率軍迎援而適患病裨將白守榮謂繼明日君病甚  
不可行守榮當率兵先往繼明慮守榮等輕戰因曰我疾少  
間遂被甲上馬強行至清遠軍卒年六十三詔贈彰武軍節  
度遷其子懷信爲供奉官

宋史

王繼升阜城人性謹愿事太宗於藩邸太宗卽位補供奉官  
漳泉平以繼升爲泉州兵馬都監游洋洞民萬餘叛攻泉繼

升率精騎二百夜擒其魁械送闕下餘黨悉平召還遷軍器

庫使領順州刺史累遷右神武將軍領本州團練使卒年六

十四太宗嗟悼贈洋州觀察使命有司營葬子昭遠形質魁

偉色黑繼升名以鐵山

宋史遂爲小字

河間府志

有膂力善騎射少

時常入山捕鷹鶻直澗水暴發昭遠升大樹得免又嘗涉河

冰陷二人共援出之昭遠神色自若喜與里中少年遊處一

日衆祀神昭遠適至或授之明瓊令卜吉凶昭遠一擲六齒

皆赤南遊京師事太宗於晉邸特被恩遇常呼其小字及卽

位補殿前都指揮使稍遷都知從征太原先登中流矢血漬

甲聞戰益急劉繼元降令守城門籍兵仗又從征范陽有功

超擢散員指揮使涪王之遷房陵也禁衛諸校以依附被譴

獨昭遠無所預太宗以爲忠累遷殿前都虞候領勤州防禦

使太宗作古詩草書於紈扇以賜之端拱二年領沙州觀察使再爲并代副都部署至道中李繼遷擾邊絕靈武糧道命昭遠爲靈州路都部署護二十五州芻粟竟達靈武繼遷不敢犯眞宗卽位徙定州行營都部署尋授保靜軍節度使充天雄軍都部署知府事咸平二年移知河陽數月卒年五十六贈太尉諡惠和遣中使護葬弟昭懿亦事晉邸至捧日都虞候昭遜官西京作坊使昭遠少時其祖母郭氏嘗指之以語其母曰此兒有貴相必爲公侯復指昭懿曰此兒俸錢過二萬不能勝矣竟皆如其言昭遠子懷晉九歲事太宗左右至西京左藏庫使平州刺史懷一供備庫副使懷正內殿承制懷英內殿崇班

宋史

周瑩瀛州景城人右領軍衛上將軍景之子也景家富財好

交結厯事唐漢周習水利嘗浚汴口導鄭州郭西水入中牟  
渠修滑州河隄累遷至是官太宗潛邸時瑩得給事左右卽  
位補殿直領騎卒數百巡警泉福州捕劇賊千餘遷供奉官  
又使綏銀州按邊事還奏稱旨擢鞍轡庫副使雍熙二年爲  
杭睦五州都巡檢使兼杭州都監擒妖僧紹倫株連就戮者  
三百餘人人以爲濫代還改崇儀使滄州都監召拜西上閤  
門使領鎮定高陽關都監加判四方館事與郝守濬塞宋州  
泆河改三路排陣鈴轄厯知天雄軍正定二府就遷引進使  
至道二年代還會李繼隆討西夏詔瑩詣軍前授以機事還  
拜客省使簽書樞密院諸房公事俄兼提點宣徽諸房鼓司  
登聞院與劉承珪竝任真宗嗣位承珪分使河北告諭加領  
富州刺史上聞其母老病閔之特封武功郡太夫人秋拜宣

徽北院使先是宣徽著位在樞密副使上瑩表請居下從之  
咸平二年大閱命爲隨駕部署從征河朔又爲駕前馬步都  
部署三年遷南院使知樞密院事會蜀平部送脅從者數十  
百人至闕下西川轉運使馬亮因入奏請赦其罪遣還瑩以  
爲當盡誅之令瑩亮廷議上是亮議悉原其罪五年高陽關  
都部署闕上以瑩練達軍事乃拜永清軍節度兼領其任爲  
三路排陣使契丹入寇詔赴甯邊軍爲援瑩至則寇兵已去  
卽日還屯所景德初丁內艱起復代王顯爲天雄軍都部署  
兼知軍府事嘗召洺州騎士千五百人赴大名道與寇直力  
戰有死傷者瑩猶謂其玩寇將悉誅之詔賜金帛諭瑩勿治  
其罪車駕北巡爲駕前東西貝冀路都部署明年改知陝州  
徙永興軍府又移邠州兼環慶路都部署時夏州內屬詔省

戍兵還營以減饋餉之費仍手詔諭瑩瑩遠奏乞留以張邊  
威上謂瑩庸懦不智以曹瑋代之徙知澶州大中祥符初改  
天平軍節度明年爲鎮定都部署兼知定州以轉運使奏徙  
知澶州境內屢有寇盜宰相言瑩任居將帥不能鎮靖請徙  
他郡上曰處之間僻適使其自偷耳遂下詔督責令其擒捕  
時發卒修河防而軍中所給糗糧多腐敗不可食又役使不  
均瑩不加恤以故亡命者衆七年入朝復遣還鎮又以澶州  
當契丹之衝復命知澶州九年被疾求還京師卒年六十六  
贈侍中初謚忠穆改元惠錄其二子供奉官普顯爲內殿崇  
班二孫永昌永吉爲殿直普後爲崇儀副使顯至內殿承制

宋史

高珪莫州人八世同居真宗時旌并蠲其課調

雍正  
志

劉摯字莘老東光人十歲而孤鞠於外氏嘉祐中擢甲科歷冀州南宮令州賦甚衆輸絹疋折稅錢五百緡兩折錢三十民多破產摯援旁郡例請裁以中價轉運使怒將劾之摯固請乃告於朝三司使包拯奏從其議

河間府志

自是絹爲錢三百

縣七十有六民歡呼至泣下曰劉長官活我徙江陵觀察推官用韓琦薦得館閣校勘王安石器之擢檢正中書禮房月餘進監察御史裹行未及陛對卽奏論亳州獄及程昉開漳河調發擾民趙子幾擅升畿縣使納役錢張靚王廷老擅增兩浙役錢人情嗟怨請行顯罰明朝廷無聚斂之意神宗面賜褒諭因問卿從王安石學邪安石極稱卿器識對曰臣東北人少孤獨學不識安石也退而上疏極言君子小人之分又論率錢助役官自僱人有十害畧曰天下州縣戶役虛實

輕重不同今等以爲率則非一法所能齊各自立法則紛擾殊甚一也謂版籍不實別立等第夫舊籍旣不可信今何以得無失不獨騷擾生事恐轉致貧富倒置二也天下上戶少中戶多上戶役數而重故以助錢爲幸中戶役簡而輕下戶役所不及今概使輸錢則貧者困矣三也有司不用舊籍欲多得僱錢耳民何以堪乎四也歲有豐凶而役有定數助錢不能偶闕非若稅賦有倚闕減放之時五也舍穀麥布帛而必輸見錢是民所不能自爲者六也二稅科買色目已多又概率錢以竭其所有則民將以農爲畏途戶口恐日耗失七也僥倖者又將緣法生奸如兩浙之倍科錢數斂怨以爲德八也差法近者十餘年遠者或二十年乃一充役民習之久矣今民輸錢而官僱人直重則輸者難輕則役者惰不將以



刀毆之乎九也且役人必用鄉戶家有常產則知自愛性皆  
素悉則罕盜欺今一切僱募則巧詐相蒙何所不至十也時  
御史中丞楊繪亦言其非司農會布爲安石作十難以詰之  
且疏劾摯繪欺誕詔問狀繪詞屈摯獨條對所難以伸其說  
且曰臣所向者義所背者利所向者君父所背者權臣願以  
臣章及司農奏宣示百官考定當否如臣言可取幸早施行  
若稍涉欺罔甘就竄逐不報明日復上疏曰陛下夙夜厲精  
以親庶政而天下未安且治者誰致之邪得君專政者是也  
自青苗之議起而天下共有聚斂之疑乃繼之以均輸均輸  
之法擾而邊鄙有不靖之虞乃繼之以助役復求水利行淤  
田併州縣舍舊謀新難以徧舉其議財雖市井屠販皆召至  
政事堂其爭利則下至日厯而官自鬻之推此而往不可究

言忠厚老成者擯之爲無能詐諛輕脫者目之爲可用守道  
憂國者謂之流俗敗常亂民者謂之通變凡政府謀議經畫  
獨與一掾屬決之同列預聞反在其後故奔走乞丐之人其  
門如市今西夏之款未入反側之兵未安三邊瘡痍流潰未  
定河北大旱諸路大水民勞財乏縣官減耗皆大臣誤陛下  
而大臣所用者誤大臣也疏奏謫監衡州鹽倉漕政一新父  
老目爲學士鹽久之簽書南京判官司農令斤賣天下祠廟  
依坊場河渡法收淨利南京闕伯廟歲錢四十六貫微子廟  
十三貫摯喟然歎往見留守張方平日不能爲朝廷言之邪  
方平瞿然請摯爲奏日闕伯遷商邱主祀大火火爲國家盛  
德所乘歷世尊祀微子宋始封之君開國此地本朝受命建  
號所因又有隻廟者祀張巡許遠報其以孤城扞大患也今

若令承買小人規利宄褻瀆慢何所不爲歲收微細實損大體乞留此三廟以慰邦人崇奉之意從之累遷吏部郎中改祕書少監擢侍御史上書曰昔周成王幼冲踐祚周公太公實爲師保仁宗皇帝盛年嗣服用李維晏殊爲侍讀孫奭馮元爲侍講皆一時之選陛下春秋鼎盛在所資養宜選賢才以充講讀之任便殿燕坐時賜廷對以廣睿智以副善繼求治之志他日經筵講讀至仁宗不避庚戌臨奠侍讀張士遜曰國朝故事多避國音國朝角音木也故畏庚辛哲宗問果當避否摯進曰陰陽拘忌聖人不取如正月祈穀必用上辛此豈可改也漢章帝以反支日受章奏唐太宗以辰日哭張公謹仁宗不避庚戌日皆陛下所宜取法哲宗然之蔡確爲山陵使神宗發引之前夕不入宿摯劾之不報及使回旣朝

卽視事摯又疏劾確不引咎而上表自陳謂昔事神宗嘗請

收拔當世之耆艾以輔王室蠲省儀文之煩碎以安民心摯

謂使確誠有是請不言於先朝爲不忠言於今日爲固寵誠

無是請則欺君也乃疏論其十罪竝言章惇凶悍無大臣體

宋史蔡確確罷爲觀文殿學士知陳州惇謫知汝州宋史蔡確後確

以車蓋亭詩十章涉譏訕貶光祿卿分司南京再謫英州別

駕新州安置宋史蔡確傳摯以確母老引柳宗元乞與劉禹錫換

播州事爲言太后不許王鞏隨手雜錄以學校約束過於煩密上疏

論之曰先帝體道制法超漢軼唐養士之盛比隆三代乃比

以太學屢起獄訟有司緣此造爲法禁煩苛愈於治獄條目

多於防盜上下疑貳以求苟免甚可怪者博士諸生禁不相

見教諭無所施質問無所從月巡所隸之齋而已齋舍皆隨

經分隸而又易博士兼巡禮齋詩博士兼巡書齋所至備禮  
請問相與揖諾或不交一言而退謂防私請杜賄賂也豈先  
帝所以造士之意哉治天下者待人以君子長者則下必有  
君子長者之行若以小人犬彘遇之彼將以小人犬彘自爲  
而况以此行於學校之間乎願罷其制又請雜用經義詩賦  
取士復賢良方正科罷常平免役薦朱光庭王巖叟爲言官  
百僚敬憚以比包拯呂晦云元豐元年擢御史中丞疏請立  
監司考績之制三遷至門下侍郎與同列奏事論人才摯曰  
人能否不一性忠實而才識有餘上也才識不逮而忠實有  
餘次也若懷邪觀望隨時勢改變則爲小人終不可用宣仁  
太后及哲宗皆嘉納之六年拜尙書右僕射摯與邢恕善摯  
之子與章惇諸子遊摯亦間與之接恕之謫永州也以書抵

摯摯答書有永州佳處第往以俟休復語爲排岸官茹東濟  
所得濟嘗有求於摯不遂憾之遂錄以示御史中丞鄭雍侍  
御史楊畏雍畏乃鍛鍊其語而上之日休復者語出周易以  
俟休復者俟太皇太后復子明辟也且言其交接惇子爲牢  
籠計以冀後福遂以觀文殿學士罷知鄆州給事中朱光庭  
疏救之光庭亦罷七年徙大名又爲雍等所過改青州紹聖  
初來之邵周秩劾摯變法棄地奪職知黃州再貶光祿卿分  
司南京蘄州居住語諸子曰上用章惇吾且得罪若惇顧國  
事不遷怒百姓吾死不足恨但慮意在報復法令益峻耳四  
年陷邢恕之謗貶鼎州團練副使新州安置惟一子從家人  
泣涕願侍皆不聽數月以疾卒年六十八摯與呂大防爲相  
時文及甫居喪怨望抵書邢恕曰司馬昭之心路人所知濟

之以粉昆必欲以眇躬爲快意之地可爲寒心司馬昭者指  
呂大防粉昆者指韓嘉彥之兄忠彥也嘉彥尙主世以駙馬  
都尉爲粉侯故云恕以示蔡碩蔡渭渭上書訟摯及大防等  
十餘人陷其父確謀危宗社引及甫書爲證章惇蔡卞欲因  
是殺摯及梁燾王巖叟遂起同文館獄用蔡京安惇雜治及  
甫以除權侍郎復德大防忠彥雖罷得帝眷及甫畏之乃言  
其父嘗以司馬指劉摯粉稱王巖叟以其面白如粉也昆謂  
梁燾以燾字况之况猶兄也會摯卒不及考驗乃免其子官  
徙其家英州凡三年死於瘴者十人徽宗立詔返其家屬用  
子跂請得歸葬貶及甫涓於湖外復摯中大夫蔡京爲相降  
朝散大夫尋復觀文殿大學士大中大夫紹興初贈少師諡  
忠肅摯自幼至老手不釋卷家藏書多自校讎得善本或手

鈔錄孜孜不倦其教子孫先行實後文藝每日士當以器識  
爲先一號爲文人無足觀矣歧能文章遭黨事爲官拓落家  
居避禍以壽終

宋史

張慤字誠伯樂壽人元祐六年進士累遷龍圖閣學士計度  
都轉運使高宗爲兵馬大元帥募諸道兵勤王慤有功儲糈  
建議卽元帥府印給鹽鈔以便商旅旬日間得緡錢五十萬  
以佐軍命以便宜權大名尹兼北京留守馬步軍都總管聞  
二帝北行率副總管顏歧等三上牋勸進最後上書極論中  
原不可一日無君高宗爲之感悟建炎改元爲戶部尙書除  
同知樞密院事措置戶部財用兼御營副使疏言三河之民  
怨敵深入骨髓請依唐人澤潞步兵雄邊子弟遺意募之聯  
以什伍而寓兵於農使合力抗敵謂之巡社爲法精詳前此



論民兵者莫及也詔集爲書行之官終中書侍郎慤善理財  
在朝諤諤有大臣節然論議可否不形詞色未嘗失同列之  
歡卒諡忠穆上每念之稱爲古之遺直云

宋史

權邦彥字朝美河間人登崇甯四年太學上舍第調滄州教  
授三遷至國子司業抗表請帝臨雍積十餘年改都官郎中  
直祕閣歷知易州相州復召爲都官郎中與王黼議不合改  
知冀州高宗開大元帥府時起兩河兵入衛邦彥率所部兵  
與宗澤自澶淵趨韋城據刀馬河尋移屯南華二帝北遷邦  
彥與澤五表勸進建炎元年五月召還命知荆南府改東平  
府金人圍東平邦彥誓以死守歷數月城破猶力戰民皆從  
之突圍以出遂奔行在有司將議失守罪帝以其父母妻子  
皆沒於敵用輕典貶二秩累遷兵部尙書兼侍讀用呂頤浩

薦除端明殿學士簽書樞密院事給事中程瑀三疏劾之不  
報尋兼權參知政事頤浩短李綱於上前帝曰綱在宣和間  
以論水災得時望邦彥言綱實無章疏第畧虛名耳蓋助頤  
浩以排綱也以此見譏於時三年卒無子以姪嗣行爲後有  
遺稿十卷號瀛海殘編藏於家

宋史

龔夬字彥和瀛州人舉進士第三簽書河陽判官擢監察御  
史以親老求通判相州改知洛州徽宗立召拜殿中侍御史  
抗疏曰好惡未明則人迷所向忠邪未判則衆莫適從今進  
退人材皆出睿斷遠近忻悅觀聖政之日新然羣奸旣擯奸  
計必且百出或僞革面而包藏禍心或煽邪說而沮撓正論  
或詭稱禍福以動朝廷或援引祖宗以脅人主苟不大爲之  
防則必墮其術中然則天下之治忽未可知也願明好惡以

示之俾共知進賢退不肖之意則太平之治不難致矣又言  
朝廷累下赦令洗滌元祐被愆之人而官職資蔭多未給還  
願申詔有司亟爲施行以伸先帝寬仁之意時章惇蔡卞猶  
用事夫首疏劾之畧曰昔丁謂當國號爲恣睢然不過陷一  
寇準耳及惇用事而故老元輔臺省侍從之臣凡天下之所  
謂賢者一日之間布滿嶺海有宋以來未之聞也其猝造不  
根之語文致叛逆之罪蓋人人自危故惇之威勢震於海內  
而怨歸先帝罪實甚矣尙何俟而不正典刑哉卞懷奸罔上  
實道惇爲惡乞秉至公昭示譴黜又言蔡京治文及甫獄本  
以償報私仇而竟敢上誣宣仁歸咎先帝以圖族滅無辜臣  
料當時必有案牘章疏可以抉其鍛鍊附會乞考證以正奸  
臣之罪於是三人者皆罷去復上疏乞正元祐后位號且言

元符后之不當竝立報聞已而元祐后再廢夫削籍編管房  
州尋徙象又徙化逢赦得歸政和元年卒年五十五紹興元  
年贈直龍圖閣六年再贈右諫議大夫官其後二人弟大壯  
少有重名從兄官河陽會布欲見之不可得乃往謁夫邀之  
出從容竟日題詩壁間有得見兩龔之語夫爲御史大壯勸  
早去官夫以爲畏友不幸早卒

宋史

牟大壯河間人雄毅有膽畧宋之割河間三鎮與金也河間  
人不從大壯率子弟共守及河間旣爲金取大壯以所統衆  
千餘入山東界築砦自固金後立劉豫爲帝大壯乃益招兵  
傳檄討豫引兵至阜城欲滅豫家遣使奉表於宋願效死殺  
賊豫與金人共擊敗之大壯遂自刎時又有聶湖者太學生  
豫鄉人也以書抵豫勸歸宋詞甚切豫誘而殺之

河間府志

天津府

賈黃中字媧民南皮人唐相耽四世孫父玘字仲寶晉天福三年進士宋初除刑部郎中出爲鎮州通判葬鄉黨羣從之未葬者十五喪孤貧不自給者咸教育而婚嫁之改水部員外郎知浚儀縣卒黃中幼聰悟方五歲玘每旦令正立展書卷比之謂之等身書六歲舉童子科父常令蔬食日俟業成

乃得食肉

宋史

十五舉建隆初進士

南皮縣志

授校書郎集理校理

累遷禮部員外郎知昇州時金陵初附黃中爲政簡易部內甚治署中有一室扃鑰甚固發視之得金寶數十匱計十數百萬乃李氏遺物也卽表上之賜錢三十萬淳化二年秋與李沆竝拜給事中參知政事召見其母王氏命坐以孟母獎之錫賚甚厚且作詩以賜之時呂端將出鎮襄陽用黃中薦

留爲樞密學士參知政事當世文行之士黃中每汲引之而未嘗言人莫之知也然性過畏蕙不能決政事四年冬與沆竝罷守本官明年知襄州至道初以疾召還朝會建儲擇大臣有德望者爲賓友黃中在選中以久疾改拜禮部侍郎兼秘書監卒年五十六贈禮部尙書賜錢三十萬旣葬其母人謝又賜白金三百兩且日勿以諸孫爲念朕不忘也黃中官翰林日太宗召訪以時事黃中日臣職典書詔思不出位軍國事非所知上以爲謹厚益重之及知政事卒無所建明時論以此少之有文集二十卷子守謙雍熙二年進士守正獻文召試賜進士官虞部員外郎守約國子博士守文殿中丞守納右贊善大夫

宋史

索湘字巨川鹽山人開寶六年進士除鄆州司理參軍

宋史

齊州大獄昭雪千餘人

山東通志

太平興國四年用轉運使和峴

薦遷太僕寺丞累遷河北轉運副使以能聞加屯田員外郎

明年契丹乘勝據中渡橋塞土門將趨鎮州湘獻計於田重

進結大陣東行言往會高陽關兵敵悉師邀我於平虜城夜

二鼓乃率兵南趨入鎮陽據唐河破敵所守砦柵敵遂遁雍

熙中召爲鹽鐵判官歷駕部員外郎招置營田副使河北轉

運使虞部郎中遷將作少監坐擅易庫縑降膳部員外郎知

相州有盜聚西山下謀斷澶州河橋犯磁州相州鄰郡發兵

千人討之莫敢前湘擇精銳三百人偵其入境掩擊而盡擒

之詔復舊官遷河東轉運使明年王超等率師趨烏日池抵

無定河水涸衆患渴適湘輦大鍬千枝至賴鑿井焉眞宗卽

位入爲右諫議大夫復充河北轉運使德州驛舊賦民馬又

役民爲官遞湘易以官馬官卒民便之內殿崇班閻自新請於靜戎威虜兩軍置場鬻茶以供軍儲湘言非便遂止或請許權場商旅以茶藥等物販易於北邊北邊商旅亦許於雄霸州市易詔湘詳議湘疏言北邊自興置權場商旅輻湊控制深得機宜今若交相販易則我之商人深入敵境彼之商人徑至雄霸或雜奸宄卒啟釁端何以弭之望仍舊制爲便尋詔復修定州新樂蒲陰湘以其地窄非屯兵所奏罷之湘少文而長於吏事所至必廣儲畜爲預備出入軍旅間亦頗著能名先是邊州權場皆自京輦貨以充之而茶茗最煩以道遠多損敗湘建議令商人沿江載茶詣邊郡人中上下交便之威虜靜戎兩軍歲燒緣邊草地以遏南牧或復請於北砦山麓中興設銀治湘以爲招寇俱奏罷之咸平二年入爲



戶部使坐請託謫將作少監出知許州徙荆南復爲右諫議大夫知廣州四年卒詔遣其子希顏護喪歸宋

張凝無棣人少倜儻自任以善射聞節帥張美壯之召置帳

下太宗在藩邸聞其名以充親軍及卽位補殿前指揮使累遷高陽關行營鈐轄六宅使真宗踐阼加莊宅使遷北作坊使咸平初契丹南侵凝挺身陷敵子昭遠年十六從行單騎突入敵陣掖凝出明年契丹兵復大至凝與范廷召於莫州東分據要害契丹遂遁凝縱兵擊之盡奪所掠而還三遷至邠甯環慶靈州路副部署兼安撫使自白豹鎮率兵入敵境擒其驍將焚三百餘帳芻糧入萬斬首五千餘獲牛馬器甲二萬降九百餘人復襲破慶州番族降熟戶之爲生羌誘脅者百七十餘族邊境獲安加甯州團練使三遷至保州駐泊

兼北面安撫使澶淵之後契丹既受盟北歸所過猶沿途剽掠詔授凝緣邊安撫使提兵躡其後契丹乃斂戢改高陽關部署以功加殿前都虞侯卒凝忠勇好功名能得志凡上所賜悉以犒師家無餘貲京師無居第真宗悼惜之贈彰德軍節度遣中使護喪還京官給葬事厚恤其家子昭遠字持正以救父出敵圍擢左班殿直寄班祇候數遷至內殿崇班天禧初閤門副使員缺真宗曰張昭遠可遂除西上閤門副使累遷鄜延路兵馬都鈐轄領忠州刺史知成德軍改四方館使滹沱河決壞城郭昭遠爲修五關環以隄水患以紓官終

左龍武軍大將軍昭州防禦使贈應州觀察使

宋史

胡元興滄州人母死負土成墳晝夜哭不絕聲太平興國中

旌其門賜以粟帛

宋史

張知白字用晦滄州清池人幼篤學中進士第累遷河陽節

度判官咸平中疏陳時務召試舍人院權右正言獻鳳辰箴

出知劍州宋史清介守法吏民皆德之四川通志踰年召試中書加

直史館賜五品服判三司開折司江南早與李防分路安撫

及還權管句京東轉運使事周伯星見羣臣俱稱賀知白言

人君當修德應天星不能為禍福因陳治安策數事帝嘉之

進右司諫尋知鄧州值關右流民入境知白發倉勸分民賴

以安累遷給事中參知政事以郊禮成遷尙書工部侍郎愠

王曾班已上累表辭曾亦固請列知白下乃加知白金紫光

祿大夫復為給事中判禮儀院忤王欽若因稱疾乞休罷為

刑部侍郎翰林侍讀學士知大名府及欽若分司南京丁謂

乃徙知白為南京留守欲藉以困欽若而知白善待之謂怒

徙知白亳州遷兵部歷尙書右丞樞密副使進工部尙書同  
中書門下平章事拜會靈觀使集賢殿大學士時進士唱第  
賜中庸中書上其本知白每進讀至修身治國之道必反覆  
陳之雖在相位清約如寒士慎名器無毫髮私一日在中書  
忽感風眩輿歸帝親問疾不能語遂薨爲罷上已宴贈太傅  
諡文節知白九歲其父終邢州殯於佛寺及契丹寇河北寺  
宇多頽圮殯不可辨知白旣登第徒行訪之得佛寺殿基恍  
然識其處旣發其衣衾皆可驗衆以爲孝感天聖中契丹聲  
言獵幽州朝廷患之知白日契丹以上初政特相試耳非入  
寇也若疑之莫若因今河決發兵以防河爲名陰備之未幾  
契丹果還師知白無子以兄子子思爲後仕至尙書工部侍

郎致仕

宋史

崔諒滄州人七世同居郡守每親謁其廬

滄州志

咸平後詔旌

之竝蠲其課調

宋史

吳及字幾道靜海人年十七以進士起家爲侯官尉閩俗多

自毒死以誣仇家官司莫能辨及盡心讞鞠活五十三人辟

大理寺檢法官徙審刑院詳議

宋史

皇祐間知華亭縣時旱蝗

及禱於橫山得雨蝗亦他去歲大稔乃教民豫修水備以待

靈潦明年大水阡陌堅完溝渠通利復大稔比三年家給人

足

江南通志

累遷太常博士至和元年疏言漢文感緹縈之請易

肉刑以鞭箠然或已死而笞未止則號爲輕刑其實殺人祖

宗鑒既往之弊蠲除煩苛用折杖之法茲蓋曠古聖賢思所

未至陛下深惻民隱親覽庶獄歷世用刑無如本朝之平恕

宜爲上天所眷而皇上春秋鼎盛青宮尙虛臣竊惑焉或者

宦官太多有傷和氣歟何則宮爲肉刑之一故古人除之重絕人之世也今宦官競求他子剿絕人理希求爵命因而天死者未易悉數夫有疾而天治世所羞况無疾乎有罪而宮前王不忍况無罪乎臣聞漢永平之際中常侍四員小黃門十人耳唐太宗定制無得踰百員今不知幾何人矣臣愚以爲胎卵傷而鳳凰不至宦官多而繼嗣未育也伏望將進獻宦官一切權罷擅宮童幼置以重法則天心必應聖嗣必廣矣疏奏帝異其言欲用爲諫官而及以父憂去嘉祐三年擢祕閣校理改右正言復疏請擇宗室子以入侍宮中以備儲副選重厚樸茂之臣以教導之以弭覬覦之心慰天下之望定長治久安之策尋又言開寶詔書內侍年三十無養父者聽養一子爲嗣違者抵死比年此禁益弛天絕人理陰累聖

嗣願詔大臣明示舊制以綏福祐明年遂權罷內臣進養子  
管句登聞檢院疏言倉廩空虛內外匱乏其弊在於官多兵  
冗請汰冗官冗兵然後除民之疾苦條上十餘事議行尋又  
請擇館職分校閣書并求遺書於天下明年日食三朝及言  
於占爲臣陵君妻乘夫四夷侵中國今皆無此三事蓋陛下  
臨朝淵默而奸佞未能盡除左右近侍驕縱無節疆場將帥  
用非其人與因劾孫沔在并州苛暴不法燕飲無度龐籍前  
在并州妄興堡砦喪師辱國事沔由此坐廢又言春秋有告  
糴今州郡有司擅造閉糴之令非聖朝子育兆民之意遂下  
詔嚴禁閉糴久之還右司諫管句國子監在職數年遇事無  
小大輒言會諫官陳升之請裁節班行補授下兩制臺諫官  
集議舊制主鐵治者得補班行至是議罷既定藁及與御史

沈起增注興國軍磁湖冶鐵如舊制主磁湖冶者大姓程叔  
良也翰林學士胡宿等劾及與起交通程氏舞文詔問狀引  
伏降工部員外郎知廬州進戶部直昭文館知桂州卒錄其  
弟齊爲太廟齋郎及當官有守初爲檢法官三司請重鑄鐵  
錢罪法至死下有司議及爭之主者恚曰立天下法當由一  
檢法耶及曰義理爲主安有高下卒不爲誄

宋史

李之純字端伯無棣人登進士第熙甯中爲度支判官江西  
轉運副使御史周尹劾廣西提點刑獄許彥先受邕吏金命  
之純往究乃其出婢所言之純以爲不當聽彥先得免徙成  
都路轉運使成都歲發官米六千石損直與民言者謂其糜  
費詔詳議興革之純曰蜀人恃此爲生百年矣奈何一旦奪  
之遂罷議秩滿復留數歲始還朝授右司郎中累遷御史中



丞疏言朝廷事下六部但隨省吏視前後批以序緩急是胥吏專命令也縱大臣不暇省宜令列曹長貳分司之當行當止必稟而後決毋拘於文則胥吏不得專而下情達矣又言衆賢和於朝則萬物和於野頃者廷論稍虧雍睦語言傳播有關風聲不可以不慎董敦逸黃基論蘇軾託誥命以毀先帝蘇轍以名器私所親皆以監司罷之純疏救乃更黜之遂引疾改工部尙書紹聖中劉拯劾其黨轍出知單州卒年七十五從弟之儀字端叔登第幾三十年乃從蘇軾於定州幕府厯樞密院編修官通判原州元符中監內香藥庫御史石豫言其嘗爲軾辟不可以任京官詔勒停徽宗初提舉河東常平坐爲范純仁遺表行狀編管太平遂居姑熟久之徙唐州終朝請大夫之儀能文尤工尺牘軾謂八力筆三昧云

宋史

刑希載滄州人進士建炎四年七月金人冊劉豫爲帝希載

以書勸豫內附豫惡而殺之

滄州志

### 正定府

李至字言幾正定人生七歲而孤鞠於飛龍使李知審家幼

沈靜好學及長工文詞舉進士除將作監丞累遷右補闕知

制誥宋史太平興國七年詔與翰林學士承旨李昉翰林學士

扈蒙等集文苑英華麟臺故事明年轉比部郎中翰林學士進右

諫議大夫參知政事雍熙初加給事中宋史時議親征范陽至

疏言用兵之道必務萬全倘有未備願且蓄威養銳觀釁伐

謀若宸斷已堅必伸天討則京師爲天下之根本大名爲河

朔之咽喉也陛下垂拱京師奉承宗廟指揮將帥殺敵致果

實爲上策暫駐鑿輿大名揚言親征以壯軍威是爲中策若

躬率六師直抵邊境北則契丹堪虞南則中原未靖臣雖不肖願效曳裾斷鞅之忠不從以目疾求罷授禮部侍郎

宏簡錄

遷吏部時初建祕閣命兼祕書監選三館書置閣中俾至總之

宋史

淳化元年八月一日至召右僕射李昉吏部尙書宋琪

左散騎常侍徐鉉及翰林學士等詣閣觀御書圖籍帝知之召內品裴愈就賜御宴出書籍令縱觀盡醉而罷明日又召權御史中丞王化基及三館學士至帝賜宴如前且作贊賜之昉請刻石閣下至疏言唐祕書省有薛稷畫鶴郎餘令畫鳳賀知章草書當時號爲三絕敢援顏真卿請肅宗題放生池碑額及近時翰林學士承旨蘇易簡乞御書飛白題玉堂之署事求賜新額以光祕府詔中書樞密院近臣觀新閣又賜上尊酒太官供膳是日上飛白書祕閣二字付中使齎賜

至及昉等詣使殿謝退就宴三館學士預焉

麟臺故事

上嘗幸祕

閣出草書千字文以賜至勒石上日此梁武得鍾繇書於破碑命周興嗣綴輯之耳於教化無補乃書孝經以賜五年兼判國子監至疏言五經書疏俱已刊頒惟公穀周官儀禮孝經論語爾雅七經疏未備望敕重加讎校以備刊刻從之至道初以至與李沆兼太子賓客召太子師事太子每見必先拜至等上表謝不敢當詔勿辭真宗卽位拜工部尙書參知政事嘗訪以靈武事至曰繼遷騷動疆場罪固難原然聖人務屈己舍垢以安億兆望陛下以元元爲念不急致討則所損者小所益者大矣昨鄭文寶絕青鹽不入漢界禁粒食不及羌夷致彼藉詞啟釁今若復不許通糧恐非招攜懷遠之意昔唐代宗雖罪田承嗣不禁魏鹽陛下宜行之以感化其

衆則繼遷之勢自孤矣若此時之靈州臣愚以爲當棄不從而靈武卒不能守咸平元年以目疾求解授武信軍節度入辭節制不允居二年徙知河南府以病求歸許之詔甫下卒年五十五贈侍中詔給其子惟良惟允惟熙等俸終制知審因至官右金吾衛大將軍

宋史

王化基字永圖正定人太平興國二年進士除大理評事數遷至右拾遺抗疏自薦太宗嘉其慷慨召試

宋史

除右補闕知

制誥賜錢百萬

宋史李沆傳

尋進右諫議大夫權御史中丞一日

侍便殿上問以邊事對曰治天下猶植嘉樹患根本不固耳

朝廷本也朝廷治則邊鄙安矣又嘗令薦士卽疏薦數十人

王嗣宗薛映耿望皆與焉

宋史

化基慕范滂爲人獻澄清五畧

其一復尙書省謂三司使額乃近代權制判官推官孔目旬

押匄院開折磨勘憑由理欠皆州郡吏局請廢三司設六尙書廢推官判官設郎官廢孔目匄押爲都事主事令史廢匄院開折磨勘憑由理欠歸比部及左右司如此則事益精詳矣有闕則請選名品相近有幹濟者依資除之其二十四司公事繁簡不同請下本省參酌以均之其二慎公舉謂頻年下詔求才但以例責舉官不擇舉主請敕朝官有聲望者先舉所知舉到則置籍書之果著廉能則竝旌舉主貪冒僨事者連坐下僚遠官之沈滯者亦令採訪司及州郡長吏廉察以聞其三懲貪吏謂貪吏損民甚於蠹之妨木望令諸路轉運使副兼廉訪之名責以覺察果能澄清部內則不次拔擢以勸有司其四省冗官謂國家封疆雖踰於古而設官亦倍於昔如江淮諸郡揚楚最劇先年止設知州一人其餘通判

推官悉皆分筦權務倉庫實能辦事兼少獄訟後添朝臣監  
臨使職類踰州縣官數統而計之一八月費十千千人則歲  
十餘萬緡果皆廉吏止糜公帑設參以貪夫必至浚民以生  
望委各路轉運及州縣同議裁減其五擇遠官謂負罪之人  
類非良善責以遠方牧民之任必至怙惡肆毒甚非撫綏之  
意自今西川廣南除授長吏請擇良善有素望者則遠人受  
賜矣書奏太宗嘉納樞密柴禹錫有奴受金禹錫實不知陳  
恕欲中傷之化基辨其誣上感悟稱爲長者俄知京朝官考  
課遷工部侍郎至道三年超拜參知政事咸平四年罷爲工  
部尙書知揚州移河南府宏簡錄進禮部尙書大中祥符三年  
卒年六十七贈右僕射諡惠獻化基爲人寬厚僚佐有相陵  
慢者輒優容之宋史戶部尙書王駿未達時館化基處樞密使

宋湜見之以女妻焉湜親族或侮醜化基日後三十年醜富

貴矣果如所言宋史王子舉正舉直舉善舉元皆能自立宋史

舉正字伯仲幼嗜學以蔭補校書郎及第知伊闕任邱二縣

累遷兵部郎中知制誥遂為翰林學士慶厯元年拜右諫議

大夫參知政事入謝仁宗曰卿未嘗干朝廷以私故不次用

卿宏簡錄三年七月歐陽修余靖論舉正懦默不任事宋元舉通鑑

正求去遂以資政殿學士尚書禮部侍郎出知許州光化軍

叛州兵謀潛應舉正捕首務斬之眾遂散徙應天府數遷至

左丞皇祐初拜御史中丞疏言張堯封憑藉妃家一日領四

使殊駭觀聽不報留班廷爭乃奪宣徽景靈二使復疏言先

朝用人雖守邊累年官止遙郡刺史今所用未盡得人而尅

期待遷何以勸後之有功者邪且轉運使者將察官吏之能



否民生之休戚也命甫下而數更不終歲而再易則恩澤自  
不克宣民疾自不克瘳矣御史唐介坐言事貶春州舉正力  
救得徙英州居半歲堯佐復爲宣徽使舉正七疏爭之又言  
狄青起卒伍不可爲樞密使不從因請解言職帝遣使就第  
賜白金三百兩除觀文殿學士禮部尙書知河南府入兼翰  
林侍讀學士

宋史

久之以太子少傅致仕卒贈太子太保諡安

簡有平山中書內制三集

宏簡錄

舉元字懿臣以上文章賜進

士出身知潮州薦海陽盧侗文行侗遂知名潮水敗隄盜乘  
間剽掠舉元夜召里豪謀捕盜乃築隄闔境宴然潮人德之

廣東通志

數遷至京東轉運使沙門島守吏每殺流人而取其貨

舉元請立監伺察全活甚多徙淮南河東夏人爭屈野地舉  
元從數騎渡河與議夏人感服

宏簡錄

治平中徙成都印井鹽

歲入二百五十萬爲丹稜卓箇所侵積不售舉元下令止之

售者日衆數遷至河北都轉運使知永興軍夏人屯境上舉

元令二裨將率千騎扼要害長安遣從事會兵涇原戒毋輕

舉驍將竇舜卿固請行不聽且日不過三日虜去矣至期果

去宋史未幾以獻議不合引疾徙陳州未行而卒年六十二子

詔字景獻亦蔭補官宏簡錄神宗時知博州俗尙椎剽詔請開

首告竝贖罪法以攜其黨元祐初開河之役與詔言秋潦爲

災民方賴賑以蘇其生未可更困以力役從之山東通志擢開封

推官出知滑州州屬有退灘百餘頃歲調民刈草備築隄民

以爲病詔乃募人佃而收之入爲度支郎中使契丹崇甯中

由大理少卿徙司農卿坐請蘇軾書醉翁亭碑罷主崇福宮

宏簡錄旋知汝州除直祕閣復以滁州事罷官起知深兗二州

數遷至刑部侍郎詳定敕令歷工兵戶三部侍郎轉開封尹子瑋時使京西攝洛尹父子兩京相望人以爲榮歷刑部尙書延康殿學士上清寶籙宮提舉復爲工部尙書上閱其老命毋拜俄以銀青光祿大夫致仕卒年七十九

宋史

牛思進無極人少從軍以膂力聞能取強弓絰耳以手引滿又嘗負牆立令二力士撮其乳曳之屹不動衆咸異之太平興國四年知平定軍從征河東石嶺關部署郭進卒命代之師還改本州團練使七年授右千牛衛上將軍致仕卒

宋史

曹璨字韜光靈壽人濟陽郡王彬子性沈毅善射以蔭補供奉官數遷至銀夏麟府等州鈐轄契丹入寇屢擊敗之又數遷至武州團練使充麟府濁輪副部署以蕃兵邀擊李繼遷俘馘甚衆又數遷至東京舊城都巡檢使疊拜彰國保靜武

甯忠武等軍節度使在禁衛十餘年未嘗忤旨天禧三年春以足疾授河陽節度同平章事卒年七十贈中書令謚武懿璨起貴胄以孝謹稱知韜畧好讀左氏春秋善撫士卒有父風子儀官至耀州觀察使璨弟瑋字寶臣父彬在諸鎮皆以瑋爲牙內都虞候厯閣門祇候李繼遷叛太宗謀帥於彬對曰臣少子瑋可召見命以本官知渭州時年十九眞宗卽位改內殿崇班仍知渭州賞罰嚴明善用間能洞悉敵情彬卒請持喪不允改閣門通事舍人遷西上閣門副使徙知鎮戎軍以書宣朝廷恩信於繼遷諸部由是康奴等族來歸繼遷畧西蕃還瑋襲之於石門川大獲繼遷死其子德明請命於朝瑋疏言繼遷罪不可赦願假精兵擒德明送闕下不報旣而西延家妙等旅請歸順諸將猶豫不敢應瑋曰德明野心

不急折其翮必颺去卽日率兵薄天都山受降德明不敢拒  
數遷至正定都鈐轄領高州刺史帝以所上涇原還慶兩道  
圖示左右曰戰守之要俱在是矣敕別繪二圖一留樞密院  
一付本道俾諸將按圖區畫尋復爲涇原都鈐轄兼知渭州  
遂破章埋族於武州滅撥臧於平涼於是隴山諸族皆來獻  
地數遷至英州團練使復知秦州兼涇原儀渭鎮戎緣邊安  
撫使唃廝囉之佐立遵上書求贊普號瑋言贊普卽可汗也  
許之則何以處唃廝囉耶乃以立遵爲保順軍節度使唃廝  
囉之舅賞樣丹有智謀工部署瑋知其與廝敦善以寶帶貽  
廝敦購賞樣丹首廝敦竟斬其首竝南市地以獻南市者秦  
渭之阨也瑋城之表廝敦爲順州刺史初張佶知秦州置四  
門若侵羌地羌人多叛去匿不敢出瑋令人馬贖罪還故地

至者數千人遂築十砦濬濠三百八十里皆役屬羌爲之其  
年唃廝囉率衆數萬入寇瑋迎戰大破之遷客省使康州防  
禦使選軍二百毀敵所立柵於野吳谷以間殺敵酋甘遵等  
於吹麻城於是河州洮蘭安江妙敦邈川黨逋諸城皆納質  
爲熟戶瑋乃作塹抵撈囉隴阨西蕃之要地立遵懼願罷兵  
歲入貢約蕃漢爲一家因遣使獻馬唃廝囉遂退保磧中不  
敢出詔褒之天禧三年德明寇柔遠砦敗我師乃以瑋爲華  
州觀察使鄜延路副都總管環慶秦等州緣邊巡檢安撫使  
歸附者甚衆拜宣徽北院使鎮國軍節度觀察留後簽書樞  
密院事丁謂惡瑋不附己除南院使環慶路都總管安撫使  
乾興初謫左衛大將軍容州觀察使知萊州謂敗復華州觀  
察使知青州數遷至彰武軍節度使卒贈侍中諡武穆瑋多

奇計善用士卒能得其死力一日張樂宴僚吏中坐失瑋所  
在明日徐出視事而賊首已擲庭中矣將兵四十年未嘗少  
失利契丹使過天雄戒其下曰曹公在此勿撓其鋒真宗處  
邊事至慎手詔詰難或至十數反而瑋皆守初議不稍紕他  
將所論亦往往密付處分初守邊時山東名士賈同造瑋客  
外舍瑋欲按邊卽同舍邀與俱同問部伍安在日已具旣出  
就騎見甲士三千環列初不聞人馬聲同歸語人曰瑋真名  
將也嘉祐八年詔配享仁宗廟庭

宋史

葛懷敏正定人父霸善擊刺騎射事太宗於藩邸太宗踐阼  
補殿前指揮使累遷昭德軍節度并代都部署徙知耀州卒  
贈太尉懷敏以蔭授供奉官數遷至萊州團練使濁流砦兵  
叛殺官吏懷敏發兵掩襲盡誅之

案山東通志懷敏聞亂日  
此不可勝誅遣一騎持檄

取爲首者令剋期自縛遲則全軍皆誅爲首者乃自殺而衆遂解散

又數遷至鄜延路總管進

殿前都虞候知延州被范仲淹劾徙涇原路兼招討經畧安撫副使慶厯三年元昊寇鎮戎軍懷敏督衆趨養馬城命諸將分四路迎敵懷敏躬率師出定西堡聞緣邊都巡檢使劉滙遇敵於趙福堡戰不利謀遣師往援謀報敵已拔柵踰邊濠懷敏乃入保定川砦敵毀板橋斷其歸路絕其水泉以師圍之懷敏爲中軍屯塞門東知鎮戎軍曹英等屯東北隅敵先以銳師衝中軍不動乃擊東北隅會黑風起東北英陣亂英面被流矢仆濠中懷敏兵遂潰懷敏爲衆蹂躪幾死輿致公瓦城久之乃蘇復選士據門橋手揮刃以拒久城者涇原路都監趙珣率騎兵力戰敵稍卻然衆皆無鬪志珣力勸懷敏還明日懷敏驅馬東南馳二百里至長城濠路已斷敵周



圍之遂與諸將皆遇害贈鎮戎軍節度使兼太尉諡忠隱子

宗晟宗壽宗禮宗師皆遷官

宋史

懷敏之未敗也安撫京東使

陳執中與賓佐論當時名將共推懷敏駐泊郭逵獨曰懷敏

易與爾必敗執中怒居數日敗聞執中乃問逵曰君何以言

懷敏非名將邪逵曰喜功傲倖徒勇無謀可擒也執中乃歎

曰君真知兵懷敏已覆師矣

宋史郭逵傳

賈昌朝字子明獲鹿人晉史官緯之從曾孫也天禧初真宗

祈穀南郊昌朝獻頌道左召試賜同進士出身主晉陵簿尋

召對除國子監說書監判孫奭稱之充潁川郡王院伴讀再

遷殿中丞出知宜興東明縣奭以老辭伴讀薦昌朝自代詔

試中書復爲國子監說書疏言母諱禮不出宮今章獻太后

服除猶諱其父名非禮也詔從之景祐中始置崇政殿說書

授昌朝誦說明白帝每相質問昌朝錄以進賜名邇英延義  
記注加直禁賢院太平興國寺災廷議修復昌朝言其夕大  
雷雨易震之象曰君子以恐懼修省且近年寺觀屢災蓋上  
天示警不當復繕西域僧獻佛骨銅像昌朝請厚賜遣還勿  
宣所獻悉允行復置天章閣侍講以昌朝爲之累遷尙書禮  
部郎中史館修撰劉平爲元昊所執或誣平降賊議收其家  
昌朝言漢族李陵乃爲後患先帝厚撫王繼忠家終得繼忠  
用願熟思之平家乃免數遷至右諫議大夫權御史中丞兼  
判國子監時議賂契丹合攻元昊昌朝言有功則何以報之  
乃止宋史復疏言方今國家削方鎮太過用恩幸太驟如楊崇  
勳李昭亮輩宜速選人代之至有功宿將不當數更刺史以

上宜慎所授以待賢者

宏簡錄

又上備邊六事其一曰馭將帥

馭之者無他思威兼用事權專屬耳太祖脫裘帽賜王全斌  
曰吾居此幄尙寒况伐蜀將士乎此馭之以恩也曹彬李漢  
瓊討江南太祖召彬前立漢瓊等於後授以劍曰副將以下  
不用命者戮之此馭之以威也彼時軍中賞罰皆聽將兵者  
專之勝則賞敗則誅今命將帥則或疑貳矣陝西四路總管  
而下鈐轄都監巡檢之屬悉參軍政謀之未成事已先漏此  
所以屢敗也請自今命將宏恩威去疑貳務責大效俾一切  
得以便宜從事其二曰復土兵今河北鄉兵久廢陝西土兵  
數爲賊破存者無幾臣以爲河東河北強壯宜詳定法制每  
鄉爲軍籍其材能絕類者遞補之陝西蕃落弓劍手貪召募  
錢物利月入糧奉多就黥涅爲營兵宜優復田疇使盡力耕  
戰世爲邊用可以減屯戍省供饋之勞費至內地州縣則宜

增制弓手如鄉軍法而閱試之其三曰訓營卒太祖時營有  
鬻酒肴者則逐去士卒服繪綵者則笞之今營卒驕惰故臨  
敵無勇一切兵仗亦殊不適用宜接八陣五兵之法嚴約束  
勤教習且令之曰失一隊長則斬一隊尙慮衆不爲用乎其  
四曰制遠人今北則契丹西則元昊有倚角中國之勢徒以  
歲幣羈之恐不足恃臣以爲西方諸國如沙州唃廝囉明珠  
滅臧之屬北方諸國如女真高麗新羅之屬舊通中國宜募  
人出使以聯之則契丹元昊勢分而體解矣其五日綏蕃部  
屬戶者邊陲之屏翰陝西緣邊諸路守臣臣以爲宜皆帶安  
撫蕃部之名且擇其族大有勞者爲首帥如河東折氏之比  
庶可爲吾藩籬之固其六曰廣偵諜太祖之時關南瀛州常  
山易州等鎮筦榷之利悉輸軍中聽其貿易而免其征稅邊

臣富於財得多遣間諜故敵情無不周知今任邊事者於敵之地勢兵形每絕不通曉何以破敵制勝邪願法太祖之制將邊城財用悉以委之俾得募死士爲耳目則不至喪師而可以折衝矣疏奏多施行之慶厯三年拜參知政事數遷至昭文館大學士監修國史元昊歸石元孫議賜死以昌朝言獲免有司議升祔奉慈廟二后昌朝曰章獻母儀天下章懿誕育聖躬宜升祔章惠於陛下有慈保之恩但當別享奉慈廟如故從之七年春旱帝避正殿減膳昌朝引漢災異冊免三公故事乞罷參知政事時昌朝數與吳育爭論上前御史中丞高若訥始附昌朝因早乃疏言大臣廷爭爲不肅故雨不時若遂罷育而除昌朝武勝軍節度使檢校太傅同中書門下平章事判大名府兼北京留守司河北安撫使帝賜銀

飾肩輿尋以討貝州賊有功移山南來道節度使邊卒每亡  
入契丹契丹號爲投來南軍亡而復歸者法當死昌朝爲變  
法歸者輒遷補因廉知契丹事契丹遂黜南軍不用邊人每  
以地質契丹昌朝爲立法質地而主不時贖人得贖而有之  
歲餘地悉復以忤三司使葉清臣徙鄭州判入覲留爲祥源  
觀使拜尙書右僕射觀文殿大學士判尙書都省尋復求外  
出除山南東道節度使右僕射檢校太師兼侍中判鄭州固  
辭僕射侍中改同中書門下平章事以母喪歸起許州判召  
對邇英閣問亢龍有悔及羣龍无首吉義昌朝言悔者可凶  
可吉之詞亢龍有悔者爻處亢極不修德則凶也見羣龍无  
首吉者謂聖人以剛健決事謙恭應物不敢自矜爲天下首  
乃吉也手詔優答又言漢唐都雍置三輔內翼京師朝廷都

汴而近京諸郡皆屬他道制度不稱王畿請析京東之曹州  
京西之陳許滑鄭皆隸開封府以四十二縣爲京畿帝納之  
將行命講讀官餞於資善堂復判大名府兼河北安撫使嘉  
祐元年進封許國公又兼侍中尋以同中書門下平章事爲  
樞密使三年宰相文彥博請罷御史恐昌朝代之乃相與言  
昌朝交通宦官遂以鎮安軍節度使右僕射檢校太師侍中  
兼充景靈宮使出判許州數遷至鳳翔尹進封魏國公治平  
元年以侍中守許州力辭不許明年以疾留京師乃以左僕  
射觀文殿大學士判尙書都省卒年六十八諡文元御書墓  
碑曰大儒元老之碑所著有羣經音辨通紀時令奏議文集  
百二十二卷子章館閣校勘蚤世清朝請大夫昌朝弟昌衡  
字子平舉進士爲梓州路轉運判官所屬富順井鹽吏每視

商賄多寡編先後昌衡則以其時序之瀘州以接夷蠻故守以武吏昌衡則請由東銓調選蠻之市馬也官區別其良駑良者送秦州駑者輒輕估直而抑買昌衡請嚴禁之遷提點淮南刑獄廣東轉運使徙兩浙路熙甯間昌衡數言利害神宗嘉之召爲戶部副使提舉市易司課羨進右諫議大夫加集賢殿修撰知河南府歷陳鄆應天府鄧州以正議大夫致仕卒從子炎字長卿以昌朝蔭得官累遷至顯謨閣待制知應天府徙鄆州永興初陝西行鐵錢久幣益輕蔡京設法盡斂之更鑄夾錫錢幣稍重京罷相轉運使李諫陳敦復行鐵錢關西皆罷市民不聊生炎獨一切弛禁聽從其便後徙知延安州宣徽使童貫復令盡費夾錫錢民益苦之炎表言中產之家不過蓄來錫錢一二萬概棄不用則惟有守錢而死



耳邊眈生計固艱法又屢變民益不安民不宏則邊不可守  
願得內郡以養母乃命爲潁州未行復留貫又沮之改河陽  
又改鄧州加直學士知永興軍入對留爲工部侍郎簽書樞  
密院河西北兩房炎獨不往賀尋以疾卒年五十八贈銀青  
光祿大夫

宋史

高化字仲熙正定人少沈勇有力不事耕稼學擊劍善騎射  
契丹犯河北化應募轉餉飛狐口楊業留麾下使捕賊酋大  
鵬翼獲之會契丹又犯正定乃辭業還家家屬盡爲契丹所  
掠去從州將入京師遂隸禁軍時眞宗爲襄王選充奉龍宮  
王尹京命巡內外人廂獲奸盜甚衆一日王趨急召出府門  
馬驚墮化掖之而起王曰微爾吾幾殆益親信之數遷至蜀  
州團練使天聖六年夏大雨命護汴隄夜馳至城西隄欲壞

督守兵負土不能過時夏守恩方典軍積材木城隅化盡取

以塞隄乃得無患仁宗嘉之又數遷至武安軍節度使知相

州有大獄已具皆當論死化遣移訊出無罪者三人踰年以

右屯衛上將軍致仕卒年八十贈太尉諡曰恭莊宋史

賈逵藁城人少孤母改適逵初隸拱聖軍卒至殿前班換西

染院副使從狄青征儂智高為右軍先鋒宏簡錄青誓眾曰不

待命而擅動者斬時左將軍孫節戰死逵私念兵數困易劬

而兵法先據高者勝乃徑引軍趨山既登賊至逵揮眾馳下

斷賊為二賊遂潰逵詣青請罪青拊其背勞之宋史使入邕州

城括貨物逵固辭遷西染院使領嘉州刺史奉其改適母還

尋轉秦鳳路鈐轄乞歸養母不許賜母冠帔徙并代路專主

麟府軍馬邊關有熟戶皆散處患寇畧遠度遠近聚為二十

七堡聯聲勢患乃息截鐵爲的激種豪使射久皆成勁旅一夕火發左右白寇至逵堅卧不起徐問之果邊人所爲也復

徙秦鳳數遷至利州觀察使

宏簡錄

入爲步軍副都指揮使都

城西南水暴溢注安上門英宗遣逵督護亟囊土塞門水乃

止議者欲穴隄以洩其勢逵請諭居民徙高避水然後決之

宋史

久之復出總鄜延兵延州夾河舊有兩城因元昊據險幾

不能守逵請築保障於伏龍山九州臺之間與城相望人以

爲便轉昭信軍節度觀察留後疏劾种諤冒功興事

宏簡元錄

豐初拜建武軍節度使殿前都指揮使請於郊赦前賜三世

官神宗曰逵武人能念親可嘉許之數月卒年六十九贈侍

中謚曰武恪

宋史

劉昌祚字子京正定人父賀戰沒於定州錄爲右班殿直主

秦州威遠砦遷西路都巡檢使遼還神宗臨試騎射授通事

舍人夏人引萬騎寇劉溝堡昌祚率騎二千出援卒遇敵力

戰不解

宏簡錄

薄暮夏酋突前昌祚抽矢一發殪之餘眾悉遁

李師中上其功移知階州討平母家等族又平疊州轉作坊

使為西河路都監從王中正入蜀破篋策羌加皇城使榮州

刺史秦鳳路鈐轄又加西上閣門使果州團練使知河州

宋史

元豐四年擢涇原副都總管從高遵裕西征與總管姚麟率

蕃漢兵五萬出湖盧川次磨齊隘夏眾十萬扼險不可前昌

祚挾兩盾先登夏人小卻師乘之斬首千七百級進次鳴沙

川取其窖粟遂薄靈州城未及闔先鋒奪門幾入遵裕領環

慶兵尙未至馳遣使止之

宏簡錄

昌祚乃令按甲勿攻是夕慶

兵始距城三十里而軍遇敵接戰昌祚遣數千騎赴之

宋史

明賊退謁遵裕遵裕怒其援遲欲誅之而奪其兵付姚麟麟不敢受乃已明日遣昌祚巡營凡所得馬糧悉奪之涇師忿而譟宏簡錄遵裕圍城十八日不能下夏人決七級渠以灌遵

裕師軍遂潰乃南還復命涇師爲殿昌祚手劍水上待衆濟然後行虜追及力戰卻之至渭州糧盡士爭入無復行伍坐貶永興軍鈐轄明年復徙涇原加龍神衛四廂都指揮使知延州時永樂方陷士氣不振昌祚大修馬政校軍中技擊優者厚賜之自義合至德靖砦懸亘七百里堡壘疎密不齊烽燧不相應昌祚度屯戍險易地望遠近事力强弱立爲定式上諸朝夏人寇塞門安遠砦拒破之殺其統軍葉惇麻咩叱埋二人乃始謀攻永樂者也圖其形以獻帝喜遣近侍勞軍

宋哲宗立進殿前馬步軍都虞候出爲雄州團練使知渭州

故時弓箭手人授田二頃有馬者增給之其後馬死不補而據地自若昌祚按舉其法耗馬遂復又括隴山間田萬頃募士卒五千別置將統之勁悍出諸軍右朝廷歸夏人四砮昌祚以爲不可再遷殿前副都指揮使冀州觀察使武康軍節度使卒年六十八贈開府儀同三司諡毅肅昌祚氣貌雄偉善騎射箭能出百步外夏人得箭以爲神持歸奉之所著射

法行於世

宏簡錄

曹佾字公伯韓王彬之孫慈聖光憲皇后弟也通音律善弈射兼喜爲詩自右班殿直累遷靜保平軍節度使同中書門下平章事封濟陽郡王神宗每咨以政事佾未嘗以語人帝嘗謂大臣曰曹王雖以親貴而端拱寡過真純臣進對未嘗名元豐中疾愈入謝帝曰舅久不覲太皇太后宜少憇內東

門朕當自啟尋召入厯上下儒釋道五閣大椿蟠桃亭再升  
殿乃退以護國軍節度使司徒兼中書令爲太一宮使給朱  
衣雙引騎吏前馬慈聖喪終請郡帝日時見舅如面慶壽宮  
奈何欲遠朕得勿禮失乎佾惶恐謝乃卽城南爲園池給兵  
庀役疏惠民河水灌之且將爲築第三百楹固辭乃止佾生  
日賚予如宰相親王哲宗卽位加少保坤成節獻壽特詔減  
拜年七十二卒贈太師追封沂王子評誘評字公正以父在  
得官累遷平海軍節度使祐神觀使使契丹者四館伴者十  
二在閣門十二年預修儀制工楷書慈聖命書屏以奉神宗  
賜玉帶善左右射雖黑夜亦能中宋史館伴時嘗雙破的使者  
驚竦宏簡錄年六十六卒贈開府儀同三司誘字公厚以蔭得  
官數遷至文州刺史使契丹至其官門館客者邀下馬同入

誘曰北使至南乘馬及朝堂門不得妄更易遂乘馬入使還  
進樞密副都承旨數遷至安德軍節度使醴泉觀使與兄評  
同日拜立雙節堂於家戚里榮之年六十五卒贈開府儀同  
三司諡忠定侂從弟偕字光道少以節俠自喜官許州都監  
幕客史沆傾險劫持爲不法上下畏之偕從容置酒對客數  
沆十罪將擊殺之沆起拜謝偕復罵曰不改必殺汝沆爲斂  
迹累遷東上閣門使帶御器械知雄州或議廢塘澱爲田偕  
曰何承矩李允則營此累年所以限契丹也不可廢進華州  
防禦使知相州徙河陽總管卒偕嘗從梅堯臣學詩堯臣稱  
之爲序其詩

宋史

劉絢字質夫常山人以蔭爲壽安主簿長子令督公家逋賦  
不假鞭朴而集歲大旱府遣吏視傷所蠲纔行其二絢力爭



不得封還其揭請易之富弼歎曰真縣令也元祐初韓維薦其經明行修爲京兆府教授王巖叟朱光庭又薦爲太學博士卒於官絢力學不倦尤明於春秋程顥每爲人言他人之學敏則有矣未易保也若絢者吾無疑焉

宋史

楊粹中正定人建炎二年金人大入時粹中知濮州固守不下粘罕以濮小郡易之將官姚端乘其不意夜擣其營直犯中軍粘罕跣足走僅以身免遂急攻城凡三十三日而陷端率死士突出粘罕入城粹中登浮圖不下粘罕嘉其忠義許以不死乃以粹中歸粹中竟不屈而死贈徽猷閣待制

宋史

智浹元氏人高宗時爲御史上書訟岳飛之冤爲秦檜所害

元氏

縣志

韓元龍正定人紹興中知天台縣或書人陰慝以告元龍謝

之曰一入吾耳則不以善良待之矣其人遂感化

浙江通志

王與正定人衡州衛鎮撫開闢安仁元兵掠境與率兵力戰

死

湖南通志

順德府

劉知信字至誠邢州人父遷晉天福末鳳翔帳前軍使改滑州奉國軍校從驍將皇甫暉禦邊有功早卒母卽昭憲太后妹也乾德初封京兆郡太君進本郡夫人開寶三年卒追封齊國太夫人陪葬安陵贈遷太保知信三歲而孤建隆三年起家供奉官累遷至左神武軍將軍尋領檀州團練使護兵屯鎮州會大舉北伐與六宅使符昭壽爲押陣都監師還諸將失道知信獨整所部以歸俄知定州兼兵馬鈐轄押大陣右偏一日設宴犒將士契丹卒至知信不介而馳之斬獲甚

衆以功拜邕州觀察使又數遷至東京都巡檢使復知定州

以疾求還朝至鎮州卒年六十三贈太尉天平軍節度知信

以戚里貴顯然循謹殊甚有聲於時子承宗承渥承宗幼善

射兼習書數以蔭補殿直寄班祇候咸平初轉供奉官鎮定

高陽關三路承受公事還掌軍器庫真宗臨幸嘉其整肅面

授閣門祇候知信卒轉內殿崇班累遷鄜延都鈐轄卒中使

護喪還京師賜葬地宋史承渥以蔭補殿直累任使職善條奏

終供奉官閣門祇候宏簡錄承宗子承釗亦官右侍禁閣門祇

候宋史

陳薦字彥升沙河人慶厯中進士爲華陽尉盜殺人棄屍民

田薦出驗有以移屍告者田主遂殺其母縣欲歸獄於田主

而免薦失盜愆沙河縣志薦不可日焉有誣人以自贖者邪尋獲

盜從韓琦定州河東幕府性木強簡澹獨琦知之最深每語人曰廉於進勇於退嫌疑間毫髮不處與人交久而不變如彥升者無幾也琦輔政薦爲祕閣校理累遷天章閣待制進知制誥知諫院薛向首謀取橫山功不成薦請以漢王恢之罪罪向楊繪論曾公亮用人不當言旣行而遷侍讀罷諫職薦曰此乃宰相欲杜繪言爾所言是宜責宰相疏人不報除龍圖閣直學士河北都轉運使河決棗強水官議於恩冀深瀛之間築隄三百六十里期一月就功役丁夫八萬薦曰河未能爲數州害民方方困願以歲月爲之還判流內銓太常寺議學校貢舉法請會三年貢士數均之諸路計口察孝廉如漢制權主管御史臺言李定匿所生母喪不宜爲御史罷臺事又以議典禮不合出知蔡州召爲寶文閣學士兼侍讀

進資政殿學士屢求退以爲本州命兩省燕餞資善堂擢其子厚御史臺主簿未幾提舉崇福宮卒年六十九贈光祿大

夫

宋史

國朝乾隆二十一年邑令杜灝申請崇祀鄉賢

沙河縣志

成閔字居仁邢州人靖康初劉韜爲正定帥募勇士捍金兵

閔在麾下高宗卽位閔領數百騎至揚州會上南渡韓世忠

追苗傅及龔兀尤討范汝爲閔皆從積功至武功大夫忠州

刺史從世忠入見世忠言臣當避此人出一頭地上嘉歎勞

勉旋以取海州功擢磁州團練使召見賜袍帶錦帛加贈玉

束帶時方與金盟世忠罷兵入爲樞密使詔進閔棣州防禦

使殿前遊奕軍統制厯遷保甯軍承宣使紹興二十四年拜

慶遠軍節度使尋丁母憂詔起復贈其母鄭國夫人金主亮

將敗盟召閔提禁旅三萬鎮武昌命湖北守漕創砦屋三萬  
間以待之發折帛米錢茶引共百四十餘萬緡義倉和糶米  
六十三萬石備軍用仍賜金器劍甲臨遣之閔至鄂未幾進  
屯應城縣八月除湖北京西制置使節制兩路軍馬九月兼  
京西河北招討使十一月詔回援淮西閔喜於得歸冒雨兼  
程趨建康士卒多道死朝廷所給犒師物盡入已不及士卒  
士卒有怨言閔斬之未幾除淮東制置使駐鎮江旣而言者  
論諸軍皆聚鎮江恐敵出不意擣上流於是詔閔發鄂州張  
成華旺軍回駐鄂亮死閔引兵渡江趨揚州及金人自盱眙  
渡淮北去閔列兵南岸軍士諾聲相聞金人笑之曰寄聲成  
太尉有勤護送閔至泗州奏已克復淮東尋入朝凡侍從卿  
監關門內侍皆有賂遺左正言劉度劾之猶超拜太尉主管

殿前司公事尋復爲御史論列罷太尉婺州居住奪慶遠節  
乾道初聽自便歸湖州尋詔復節都統鎮江諸軍九年請致  
仕治園第於平江淳熙元年卒年八十一贈開府儀同三司  
子十一人宋史

范炎邢臺人嘉定中知晉陵縣剔奸除蠹民瘼以蘇民皆如

期納租賦

江南通志